

Al è il moment di superâ lis visions pessimistichis e puartâ fûr lis tantis cualitâts che dut il mont nus ricognòs

Istât furlane tra balon, universitât e lenghe

Lis polemichis: la acuile de Udinese, i tais ai ateneus e la cuistion di Pordenon

di LORENZO PELIZZO *

Il clime de nestre istât al è scjaldât di cualchi polemiche dal dut *furlane*, li che dispès a cjapin part ancje *furlans* cul lôr complet di sintîsi simpri sierâts dentri di chei altris e tajâts fûr des situazions plui impuartantis.

La prime polemiche e riuvarde il simbul de Regjon autonome Friûl Vignesie Julie metût sù di chest an su lis maiutis de Udinese. Par cualchidun e je une ofese ai simbui storicis dal Friûl: se su la maie de squadre dal cûr si veve di meti une acuile (o miôr un variûl?) si veve di sielzi chê dal Patriarcje Bertrant di Saint-Geniès.

Nò o pensin invezit che e sedi une buine sielte: finalmenti si fâs bon in maniere uficiâl che la Udinese, squadre de capital dal Friûl storic, e je la squadra che e rapresente no dome la comunitât furlane, ma dute la regjon te categorie plui alte.

Chest, naturalmenti, nol impedîs a cui che al vûl di lâ al stadi cu lis maiutis e lis bandieris che a ripuartin la acuile di Bertrant. Anzit, e sarà une maniere simpatiche e plasevule par leâ ancjemò di plui lis fortunis de Udinese ae storie dal Friûl.

La seconde polemiche de istât furlane e je dedicade ae competizion tra i doi ateneus regionâi, sburtade des norms fatis buinis dal guvier nazionâl che a ridusaran lis risorsis fin cumò destinadis

ais universitâts talianis.

Di chest intervent e varès partant di nassi la necessitât di un acuardi tra l'Ateneu di Udin e chel di Triest par razionalizâ la ufierte formative e eliminâ eventuâi doplons, che vuê no si puedin plui sostignî.

Intun prin moment al someave che ancje la Regjon e fos di chest stes parê e che il prin pas al sarès stât la costituzion di une sole Fondazione pe Universitât regionâl.

I approfondiments che a son vignûts daûr, però, a àn ripuartade la discussion ae juste dimension. Cui che al pense di podê obleâ i doi Ateneus a metisi adun al fale, considerât che lis comunitâts academiche a àn plene autonomie in chest cjamp e che i grancj vantaçs puartâts in argoment dai promotôrs de privatizazion de universitât taliane a somein vèrs dome a cui che nol è un espert dal setôr.

Il Parlament al fondâ la Universitât dal Friûl cul obietîf di «contribuî al progès civil, sociâl e de rinassite economiche dal Friûl e di diventâ un imprest organic di disvilup e rignuviment dai filons originâi de culture, de lenghe, des tradizions e de storie dal Friûl». Chest al jere ce che a volevin i paris fondadôrs de Universitât dal Friûl e chest al è chel che l'ateneu di Udin al à puartât indevant metint lidris simpri puli profundis tal territori. Trente

Difindi une Universitât che e à metût lidris profundis intal territori

agns di ativitât a àn puartade cheste Universitât a otignî un rûl dal dut positif pal Friûl, come che a mostrin i efets sul nestri tiessût sociâl, economic, culturâl e i otims risultâts intes graduatoriis nazionâls che a misurin il lavôr des universitâts talianis.

Chescj a son fats di veretât che ducj i furlans a àn di cognossi e puartâ cun braure. Po dopo, propit parcè che i furlans a àn nomee di spara-

gnins, si varà salacor di resonâ di sinerjiis, di razionalizazion, di colaborazion tra i ateneus par garantî chel che il Friûl e i furlans a àn domandât e otignût: une universitât publiche, leade al territori e di grande cualitât inte ricercje e inte didatiche.

La tierce polemiche e riuvarde invezit Pordenon, une citât che tai ultins agns e à fat tant par vê un rûl regionâl. Cu la sielte di ritirâ la delibare precedente che e atestave che tal territori comunâl si fevele furlan, il Consei comunâl di Pordenon al à, di fat, declarât che la citât si cjate in vere difoltât a jessi a cjâf di une provincie par doi tierçs furlanofone.

Pordenon al à naturalmenti dut il dirit di decidi in autonomia ce che al vûl, ma o pensin che al varès vût di tignî a mens cun plui atenzion i territoris furlans de provincie.

Trê polemichis, in sumis, dal dut *furlanis*, che a partis sin di une vision pessimistiche di cui che al viôt simpri la tace mieze vueide. In veretât la Udinese, la Universitât dal Friûl e la lenghe furlane a fasin part de nestre tace mieze plene, che e puarte fûr dal Friûl chei elements positifs che tancj a cognossin e nus ricognossin. Ancje i triestins. Fûr che, naturalmenti, i *furlans*.

*President de Societât Filologjiche Furlane



Palaç Florio,
sede de
Universitât dal
Friûl. A
diestre, doi
zuiadôrs de
Udinese cu la
acuile su lis
gnovis maiutis

